

Zeitschrift: Annalas da la Societad Retorumantscha
Herausgeber: Societad Retorumantscha
Band: 71 (1958)

Nachruf: Prof. dr. Pieder Tuor
Autor: Cahannes, Augustin

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 23.08.2025

ETH-Bibliothek Zürich, E-Periodica, <https://www.e-periodica.ch>

Prof. dr. Pieder Tuor

da dr. Augustin Cahannes

Scriver il necrolog per in magister e menader spirtal ch'ins ha adina venerau ed admirau senza resalva ei ina missiun empau greva, cunquei ch'ins ha difficultads d'anflar ils plaids per dar expressiun sufficienta alla engrazieivladad duida al defunt. Prof. dr. Pieder Tuor ei staus in tal magister e menader, e la nova ch'il Segner hagi clamau a casa el il di de Numnasontga 1957 ha leventau in eco de malencurada buca mo tier tuts ses anteriurs scolars, mobein era en mintga vallada romontscha. La tgina de prof. dr. Pieder Tuor ei stada ad Aquila ellas Abruzzas (Italia), nua che ses geniturs posse-devan ina fatschenta. Leu eis el naschius ils 19 de fenadur 1876. Siu bab, oriunds da Breil, ei denton morts gia igl onn 1882. Per quella raschun ei la famiglia setratga a Lags, ella vischnaunca d'origin della mumma. A Lags ha il pign Pieder passentau ils onns d'affonza e frequentau la scola primara. Quels paucs onns a Lags han denton giu ina immensa influenza sin cor e spert dil futur professer. Leu ha el impriu d'enconoscher il palpitar dil cor romontsch e grischun, leu ei naschida e carschida enten el quella affecziun nundestruibla per nossa cultura e historia, che nus havein adina stuiu admirar. Lags, il vitg matern, ei era staus il liug, nua prof. Tuor ha adina puspei renovau e recuvrau sias forzas per puder ademplir sia gronda e nobla missiun. Onn per onn ha el passentau leu sias vacanzas, e visitond el han ins adina survegniu l'impressiun, ch'el sesenti negliu aschi de casa, aschi ventireivels sco a Lags. Aunc en aulta vegliadetgna ha el dau expressiun a sia nunmideivla attaschadad al vitg matern cun ereger ina stupenta casa a Lags.

Gia cun endisch onns va Pieder sin claustra ed entscheiva cul latin. El absolva leu quater latinas — pli biaras haveva Mustér buca da gliez temps — e serenda lu a Sviz, nua ch'el finescha il gimnasi cun la matura. Pieder Tuor raquintava bugen dils onns de Mustér e



Prof. dr. Pieder Tuor

Sviz ed ei adina staus attaschaus a ses anteriurs mussaders. En scadin cass ha el fatg fetg e bein diever de ses onns de gimnasi, pertgei sias grondas enconuschientschas dil latin han fatg vegrünir nus beinenqualsadas pigns e humiliteivels, cura che nus legevan cun el las pandectas en siu seminari giuridic a Bern.

Suenter la matura stat mintga student avon in fetg impurtont spartavia. Tgei direcziun ir? Era Pieder Tuor fuva l'entschatta buca diltut el clar, tgei clamada eleger. El serenda perquei a Ruma ed entscheiva cul studi della filosofia. Suenter seriusa ponderaziun semadira finalmein la decisiun de sededicar alla giurisprudenza. Oz astgein nus segiramein dir, che quella decisiun seigi stada buna.

Pieder Tuor senscriva alla facultad giuridica da Friburg, frequenta denteren aunc las universitads de Bern e Berlin e doctorescha a Friburg igl onn 1903 «summa cum laude» cun la dissertaziun ord la historia dil dretg «Ils libers de Lags».

Ils talents extraordinaris dil giuven docter han stimulau l'universitat de Friburg de prender en vesta quel per professer dil dretg roman. Per seprofundar e sespecialisar en quella materia serenda Pieder Tuor all' universitat de Vienna e teidla leu surtut il renomau per-scrutader dil process civil roman Murezi Wlassak. A Vienna conce-pescha el era sia lavur de habilitaziun «Die mors litis im römischen Formularverfahren». Sin fundament de quella numna la regenza dil cantun de Friburg 1905 Pieder Tuor professer extraordinari per il dretg roman. Gia treis onns suenter, pia 1908 suonda sia nomina sco ordinarius.

A Friburg ha Pieder Tuor dociu il dretg roman per tudestg entochen 1912. Da 1912 entochen 1920 ha el aunc supriu las lecziuns de dretg roman per franzos, aschia ch'el haveva ina professura dubla. Igl onn 1919/20 entupein nus prof. Tuor sco rector magnificus della universitat de Friburg. Ils onns de docent a Friburg ein stai per Pieder Tuor temps de gronda satisfacziun e muntada. Leu ha el empriu d'enconuscher sia consorta Maria Comte, ch'ei stada entochen sia mort la curteseivla, buntadeivla e fideivla cumpogna de viadi. Leu ha el giu caschun de formar ed educar duront treis lusters la gronda part dils giuvens giurists della Svizzera catolica. A Friburg eis el finalmein grazia a sia gronda intelligenza, a sia energia e luvrussedad daventaus il scienziat renomau e renconuschiu ell' entira Svizzera e sur ils confins de quella ora. Igl ei perquei capeivel, che prof.

Pieder Tuor ha salvau entochen la fin de sia veta ina affecziun speciala per Friburg e sia universitad.

Igl onn 1920 vegn prof. Pieder Tuor clamaus a Genevra sco docent per il dretg roman, per il dretg d'obligaziuns ed il dretg de commerci. Sia dimora a Genevra ei denton stada cuorta, essend che la regenza de Berna ha gia igl onn 1922 envidau el de surprender la sedia per dretg roman all' universitad dil márcau federal. Entochen 1946 — igl onn ch'el ei sereratgs muort vegliadetgna — ha el dociu il dretg roman reguladamein e da temps en temps era il dretg d'ierta svizzer. Igl onn 1944/45 ei Tuor danovamein «rector magnificus» dell' universitad de Berna.

L'activitat de prof. Pieder Tuor ei stada aschi vasta e fritgeivla, chi'gl ei buca lev de dar era mo ina survesta. Nus vesein el sco professer, sco autur d'impurtontas ovras giuridicas e sco grond promotur ed autur romontsch.

En speciala veneraziun ed engrazieivladad seregurdein nus de nies professer Pieder Tuor sco mussader. El ei buca staus in docent che presentava semplamein sia scienzia als students senza sempitschar pli bia de quels. Sia entira personalitat e sia moda de plidar scaffevan ina certa cordialitat che captivava mintga student. Siu referat era sempels e clars, era sch'ei retractava dils pli grevs e complicai problems giuridics. El veseva sez clar e saveva far clar. Muort sia cordialitat haveva era mintga student cumpleina confidanza sin el e senuspeva buca de suttaponer era meinis pli u meins madirs al professer. Quel da sia vart haveva capientscha per tut e s'interessava de tut quei ch'il student patertgava. A professer Tuor muncava la luschezia digl um de scienzia dil tuttafatg. Nundumbreivlas gadas havein nus cumpignau il signur professer suenter las lecziuns dall' universitad a casa. Quasi mintgagada sesvilupava en cuort ina discussiun sur damondas de dretg, che occupavan ual el. All' entschatta sco student d'in ni dus semesters havevan nus empau retenentschas de dir nies agen meini al professer. Quel insisteva denton, ch'ins exprimi il meini remarcond, chi'l dretg seigi nuot auter che la sauna raschun e la sauna raschun sappi in pur ni student haver ual aschibein sco in docter ni in professer.

Quella moda de conversar cun ils students quasi sco sch'els fussen de siu pèr ha acquistau l'affecziun e veneraziun de mintgin. Quei tonpli ch'ins senteva, che siu agir era dictaus d'ina buontad naturala.

Surtut per nus students grischuns haveva prof. Tuor adina in special quitau ed in speciala carezia. Sch'in grischun s'anunziava per igl examen, era nies professer il bia pli malruasseivels ch'il candidat entochen ch'igl examen era vargaus. Sch'igl examen vegneva denton fatgs cun bien success, compareva prof. Tuor cun immens plascher al «Stamm» ed emblidava ualti ditg ded ir a casa. Nus scolars de prof. Tuor vegnin adina a salvar el en engrazieivla e pia memoria sco excellent mussader e sco ver amitg patern.

En siu necrolog ella Nova Gasetta de Turitg ha prof. Pieder Liver secret, prof. Pieder Tuor havevi tut las qualitads d'in bien giurist, mo el survargavi sco mussader ed um della scienzia lunschora in bien giurist. Quella perschuasiun survegn mintgin, che legia sias ovras giuridicas. En emprema lingia encorschan ins immediat, ch'igl autur domina la materia en moda suverana. Ins senta ch'in «meister» scafflescha l'ovra. El vesa e sliglia ils problems. Buca meins mereta admiraziun la moda a maniera, co prof. Tuor ei el cass de dilucidar damondas giuridicas, aschia ch'era il laic capescha senz' auter il problem e seperschuada della gestadad della sligiazion. Il lungatg ei sempels, mo clars e logics. El renunzia a tuttas periodas complicadas e contonscha cheutras la capeivladad necessaria. Evidentamein ha el imitau en quels graus ils auturs franzos che capeschan sco el de scriver clar e sempel e tuttina elegant. Pliras gadas ha el declarau a nus, il stil complicau seigi tuttavia buc in mussament, ch'igl autur hagi in special dun scientific.

L'emprema lavur giuridica de gronda muntada ha prof. Tuor publicau cun caschun dell' introducziun dil cudisch civil svizzer. Suentter che l'assemblea federala ha giu acceptau quel igl onn 1907, ei prof. Tuor sededicaus cun tutta forza alla introducziun dil dretg niev. En in ciclus de referats, ch'el ha teniu da Tavau entochen Brig, ha el tractau sistematicamein in niev dretg civil svizzer, comparegliond quel cun il dretg veder e punctuond las midadas. Quels referats han formau il fundament per igl enconuschent cudisch «Das neue Recht», che prof. Tuor ha publicau 1912, igl onn ch'il cudisch civil svizzer ei ius en vigur. Quella publicaziun ei stada l'emprema descripziun totala de nies dretg civil svizzer e ha contribuiu grondamein per far quel enconuschents e capeivels agl entir pievel svizzer. Il «dretg niev» de prof. Tuor ei staus ditg in instrument nundispensabel per ils students de dretg ed in fideivel cussegliader per mintga

advocat e derschader, gie per tut tgi che s'interessava de damondas dil dretg civil. Suenter biabein in decenni ei la edizion denton stada exhausta, aschia ch'il cudisch era buca de survegnir. Igl autur de questas lingias seregorda aunc fetg bein, ch'el ha suittascret cun ils auters students de Berna ina petiziun a prof. Tuor, sinaquei ch'el procuri ina nova edizion. Prof. Tuor che ha giu buca pign plascher de quella demarscha, ha declarau a nus suenter haver retschiert la petiziun: gie sch'ils students giavischan, lu stoi jeu semetter vid la lavur.

Cun caschun della secunda edizion retractava ei buca pli d'introducir in dretg niev. Per quella raschun ha prof. Tuor transformau empau si' ovra, laschond curdar las expectoraziuns davart la midada dil dretg. El ei seconcentraus sin la descripziun sistematica dil dretg civil svizzer, risguardond el medem temps la practica della dertgira dapi ch'il Cudisch civil svizzer ei ius en vigur. La secunda edizion ei comparida 1932 sut il tetel «Das Schweizerische Zivilgesetzbuch». Il cudisch ei staus fetg beinvegnius ton als students sco als umens della practica. Ch'el ha satisfatg ad in grond basegns, demuossa il fatg, ch'el ei comparius igl onn 1953 en sisavla edizion.

La gronda part della lavur scientifica de sia veta ha prof. Tuor dedicau a siu grond commentari dil dretg d'ierta. Ei retracta veramein d'ina ovra monumentala, che sto vegnir consultada oz da mintgin che s'occupescha pli detagliadamein de damondas dil dretg d'ierta. Il commentari de Tuor ei fetg savens decidents buca mo per las dertgiras districtualas e cantonalas, mobein era per la dertgira federala.

Las empremas furniziuns dil commentari ein comparidas cuort suenter ch'il cudisch civil svizzer ei ius en vigur. La davosa furniziun arriva igl onn 1929. L'entira ovra ha dau in tom de varga 1100 paginas. Quei che nus admirein vid quella publicaziun monumentala ei puspei en emprema lingia la sempladad e capeivladad dil lungatg e la sistematica clara, aschia ch'era il laiv legia e capescha senza difficultads. Buca meins admiraziun mereta denton era il cuntegn. Il commentari de Tuor dat risposta a quasi tuttas damondas, che san vegnir fatgas en connex cun il dretg d'ierta. Quei vul dir bia, pertgei sch'ina lescha ei aunc aschi clara e concisa, vegn ella tuttavia mai a saver satisfar senz' auter a tuttas relaziuns e variaziuns della veta. Ei dat adina puspei cass de dretg, ch'ein aschi complicai, ch'igl ei buca senza

auter clar, co els ston vegin sligai. En siu commentari ha prof. Tuor demussau, ch'el haveva in egl clar, che veseva quellas relaziuns e variaziuns della veta era el futur. El haveva veramein la «fantasia giuridica» sco prof. Liver numna quei dun de prof. Tuor en siu necrolog ella Nova Gasetta de Turitg. Ual quella qualitat dil commentari dat ad el ina immensa valeta practica e spargna en beinenqual cass pareris custeivels.

Il commentari dil dretg d'ierta vegn a francar per adina il num de prof. Pieder Tuor denter ils megliers giurists svizzers. El vegn a restar in monument «aere perennius» ella scienzia giuridica de nossa patria.

Prof. Tuor ha insumma dedicau ina gronda part de sia activitat al dretg d'ierta per il qual el haveva ina affecziun speciala. El valeva era ell'entira Svizzera per l'emprema autoritat sin quei terren. Per quella raschun vegneva el era consultaus continuadamein en fatgs d'ierta e ses pareris havevan gronda peisa tier tut las dertgiras. Plinavon savein nus aunc allegar differentas publicaziuns de gronda valeta ord il dretg d'ierta: «Der Grundsatz des Universalsukzession im römischen Recht und in der modernen Gesetzgebung», «Überlebender Ehegatte und Nachkommen in Theorie und Praxis des Schweizerischen Erbrechts», «Herabsetzung und Ausgleichung», «Wie man in der Schweiz ein Testament macht», «Testament und Erbvertrag».

Buca meins interessantas che las publicaziuns de prof. Tuor eran sias lecziuns sur il dretg d'ierta. Nus anteriurs scolars de prof. Tuor vegin mai ad emblidar quels collegs clars e concis cungi de spért e buontad ed enqualgadas era d'ina pulita presa humor.

Nus Grischuns havein tutta raschun d'esser loschs de nies compatriot Pieder Tuor muort sias grondas prestaziuns per la scienzia. Mo aunc pli engrazieivels restein nus ad el per ils nundumbreivels survetschs, ch'el ha prestau a nossa cultura ed a nies lungatg romontsch. Malgrad ch'el era professer a Friburg e Berna, malgrad ch'el era adina ferm occupaus cun impurtonts problems scientifics, ha el buca mo mai emblidau la tiara e la mumma romontscha, mobein adina sentiu il palpitar dil cor de quella. Malgrad la distanza eis el adina vivius cun cor e patratg denter nus.

Ils onns navonta dil davos tschentaner, cura che Pieder Tuor era el studi, fuva Caspar Decurtins il grond menader ed animader el

combat per nossa cultura e nies lungatg. Il pign student de Lags cun siu cor aviert per tut bien e bi ei spert s'inflammaus per ils ideals propagai cun gronda ardur da Caspar Decurtins. Pieder Tuor e siu amitg inseparabel Gion Cahannes ein stai cun Caspar Decurtins sper la tgina della Romania. Quels dus amitgs astgein nus numnar ils dus Mentors della Romania duront ils treis emprems decennis suenter la fundaziun. Ei ha bein strusch dau ina radunonza della Romania en quei temps senza la presenza de quels dus amitgs. Omisdus capevan d'animar, entusiasmar ed empalar ils students en ina moda admirabla. Els eran adina perina, deno sch'ei retractava de finanzas. Gion Cahannes cun siu anim grond s'empatschava pauc de finanzas e deivets e giavischava mo, ch'ei vegni prestau bia, manegiond, ch'enzaghi vegni lu bein a pagar. Pieder Tuor che haveva buca pli pign anim era sco giurist en quels graus pli precauts. Era el giavischava bunas prestaziuns, mo insisteva ch'era las finanzas della Romania seigien adina en bien uorden. Quellas carplinas plitost academicas disturbavan denton mai lur amicezia; ellas devan plitost mo perdetga de lur perschuaision interna e de lur quita per la buna caussa.

Era ils davos decennis, cura che Raymund Vieli haveva surpriu la rolla dil Mentor, ha prof. Tuor muncau en paucas radunonzas della Romania. Cun plascher seregurdein nus aunc dil plaid spir forza e fiug, ch'el ha tegniu igl onn 1955 a Trun cun caschun dell' inauguraziun dil monument per Caspar Decurtins.

Bein ei la Romania stada per Pieder Tuor propri la famiglia romontscha, per la quala el ha adina luvrau e barhau. Denton ha el buca surveisiu ni negligiu l'ulteriura cumunanza romontscha. La Ligia Romontscha ha giu en el in bien amitg e cussegliader ton igl onn della fundaziun sco pli tard. Era quella ei adina puspei seviulta a prof. Tuor per cussegli e sustegn, cura ch'ei retractava de sligar problems pli difficults. El era adina promts, adina survetscheivels.

Buca meins impurtonta ei l'activitat de prof. Tuor sco scribent romontsch. Gia las empremas annadas digl Ischi redegidas da Caspar Decurtins portan interessantas lavurs de sia plema. Gia cheu muossa el sia speciala predilecziun per temas ord la historia dil dretg grischun. Ual quella predilecziun ei ina perdetga per sia carezia per nossa tiara e cultura. Siu tema per la dissertaziun, «Ils libers de Lags», ch'ei secapescha scretta per tudestg, ei senza dubi era naschius ord quella carezia. En igl Ischi VI de 1902 publichescha el ina part de

quella lavur per romontsch cun il tetel «Il comitat de Lags». Igl Ischi VII de 1903 porta ina fetg interessanta lavur «Ils proverbis giuridics romontschs», e quel de 1906 VIII in studi giuridic-historic «Dal temps della reformaziun».

Igl onn 1907 ha Caspar Decurtins, igl emprem redactur digl Ischi abdicau. La Romania ha lu giu la ventireivla idea d'incaricar prof. Pieder Tuor cun la redacziun. Cun tschaffen e forza giuvenila ha quel surpriu la tgira per igl organ della Romania. Ell' introducziun de sia emprema annada, digl Ischi IX, engrazia el a siu antecessur e declara de vuler marschar «vinavon per la medema strada». Sco en sias grondas ovras scientificas vul el era scriver igl Ischi en moda clara ed entelgeivla. «Nuslein sestentar de purtar mo lavurs de valeta litterara, ne scientifica, lavurs denton entelgeivlas a scadin cumin um ord il pievel romontsch; nus scrivin per il pievel sco el viva e braha en nossas muntognas.»

Prof. Tuor ha teniu quella empermischun. De quei dattan perdetga las annadas digl Ischi da 1907 entochen 1926. Sco redactur eis el buca secuntentaus de mo procurar per buns collaboraturs e de ordinar lur lavurs. El ha era sez scret e turnau a scriver. Mintga Ischi comparius sut sia redacziun porta silmeins ina lavur impurtonta de sia plema. Era suenter 1926, igl onn ch'el ha surdau la redacziun a Raymund Vieli, eis el restaus in fideivel collaburatur digl Ischi.

Capeivlamein pertuccan las lavurs publicadas egl Ischi en emprema lingia materias, per las qualas Pieder Tuor haveva ina speciala predilecziun. Alla historia dil dretg grischun, al terren ch'el ha entschiet a cultivar gia en sia dissertaziun, ha el dedicau in diember preziousas lavurs. En ina emprema annada, Ischi 1907 (IX), publichescha el il zun interessant tractat «Co dertgavan nos babuns sur malfatgs». Igl onn 1911 compara sia lavur «La passiun de Sumvitg» cun fetg instructivas ponderaziuns sur la veglia procedura penala de nos cumins. Cun caschun dil giubileum della Ligia Grischa digl onn 1924 dat prof. Tuor sclarament ed instrucziun al pievel romontsch sur «La brev della Ligia» e sur «La fundaziun della Ligia Grischa tenor ils vegls cronists». Ina fetg meriteivla ed impurtonta publicaziun ei plinavon sia lavur sur «Ils documents giuridics romontschs», comparida 1928 egl Ischi XX.

Quellas lavurs ord la historia dil dretg ein surtut d'eminenta impurtonza scientifica. Mo prof. Tuor, ch'enconuscheva sco strusch in

auter la muntada dil dretg per mintgin, haveva era il basegn d'instruir il pievel romontsch el dretg modern. Quei ha el gia mussau cun siu cudisch «Das neue Recht». Era agl Ischi ha el mess a disposizion sia plema per quei intent. Cun plascher ed interess ha il pievel romontsch legiu sias publicaziuns «Vegl e niev dretg civil», 1908, «Il niev dretg d'ierta ed il stan puril», 1909, «Sul far testament», 1910. Quella lavurs concisas, claras ed entelgeivlas per mintgin han gidau grondamein a popularisar il niev dretg civil. Era oz rendan ellas buns survetschs a tgi ch'enquera sclariment en quellas damondas de dretg.

Sper quellas materias giuridicas, ch'eran propriamein gia de professiun il paun de mintga di per prof. Tuor, ha il moviment romontsch cun ses problems e combats adina scaldau siu cor e siu patratg. Igl Ischi, igl organ della Romania, era per el ina scantschala quasi predestinada per dar expressiun a ses sentiments ed a sias ideas. El ha era fatg diever de quella scantschala e publicau in diember artechels che nus astgein numnar programatics per il moviment romontsch.

La Romania era en sia fundaziun ina societad exclusivamein studentica ed academica. Ils emprems diesch onns eis ella era facticamein s'occupada mo dils students e studegiai. Ils menaders della Romania ein denton vegni pertscharts, che quella activitat seigi buca sufficienta per mantener il romontsch. Per contonscher quella mira era ei necessari d'interessar e gudignar igl entir pievel. Per quella idea batta Pieder Tuor via en sia «Orientaziun» egl Ischi de 1910. Als dubitaders e targlinaders di el: «Nus mein tiel pievel, mo buca per sesbassar en faulsa popularitat, buca per sedrizzar suenter sias lunas e queidas, mobein per trer el ad ault tier l'enconuschientscha ed amur de quei ch'ei ver, bi, sogn e venerabel.» Quei patratg programatic ha la Romania lu era facticamein realisau.

Prof. Tuor ha era tractau problems de muntada generala per il romontsch. Egl Ischi de 1912 anflein nus ina biala lavur «Nus Romontschs ed il Talian» ed en quel de 1922 ina tala sur «La muntada nazionala dil lungatg romontsch». Interessants ei era siu necrolog per Caspar Decurtins, per il grond campiun de Trun, comparius egl Ischi 1918.

Aunc differentas publicaziuns romontschas de Pieder Tuor, comparidas egl Ischi ed en auters organs, fussen meretas da vegnir allegadas. Per buca surpassar memia il spazi concediu stuein nus trala-

schar quei. Remarcar stuein nus denton, che prof. Tuor ha era adina puspei mess a disposiziun sia plema a nossa Gasetta Romontscha. Quei ei segiramein per part daventau per amicezia enviers ils redac-turs, mo da l'autra vart segiramein era, perquei che Pieder Tuor ha-veva in basegns intern d'orientar ed instruir nies pievel era da quella scantschala anora.

Alla fin astgein nus dir, che prof. dr. Pieder Tuor seigi staus denter ils Sursilvans che han bandunond la patria clamau cun Alfons Tuor:

Stai bein o Surselva, ti pievel roman,
Fideivels er stundel a ti el lontan!
Miu pievel, jeu sentel, jeu sun de tiu saung,
A ti auda semper miu cor e miu maun!

Pieder Tuor ha teniu quella empermischun ed ei staus fideivels a siu pievel roman, al pievel de siu saung. Siu pievel vegn era a restar fi-deivels ed el, salvond el per adina en pia ed engrazievla memoria.